

滇雲歷年傳

滇雲歷年傳卷九

雲南叢書史部之一

契臯老人倪蛻輯

曾孫慎樞梅岑恭校

起明神宗萬歷十三年盡崇禎十六年

明神宗冲年嗣位初政清明自十一年相國張居正
歿後君德日損盖不勝其驕逸貪惑之心也雲南邊
鄙而世多膠於金縷作貢之說神宗於是加貢金開
鑛場克闡紛來而西南民力困矣此皆十三年後事
也相繫於天下顧不重哉

十三年乙酉六月昆明縣雨雹害稼

以平隴川功賜巡撫劉世曾一品服加侍郎銜兼督川

貴兵餉黔國公沐昌祚加太子太保賜蟒玉各廕一子
賞賚司道府州縣銀緞各有差

陞劉綎鄧子龍俱都督同知副總兵

蛻按此役劉綎功最而鄧子龍攀枝花捷後無聞故
露布內亦俱不及今劉鄧陞賞相同何也又巡撫董
裕師宗何鉦一則會疏請兵一則隨軍宣諭而功賞
俱不及乃知軍興尺籍其有無虛實固不可以常理
拘也噫

秋八月鄉試通省生儒取莫與京等四十五人

志成進士者莫與京張弋邵年齊

冬車里八百俱奉方物貢獻

附隴川逆酋岳鳳解京獻俘告廟儀注萬歷十三年
九月日禮部儀制清吏司爲仰仗天威計擒元惡恢
復疆土恭報西南蕩平以紓聖懷事奉本部送該本
部題本司案呈本部送先准兵部咨稱雲南鎮巡等
官某某等恭報節次擒斬逆犯首級二千一百二十
八名願及逆賊岳鳳父子等五名續添莽磨啞安得
皮一名押解到京乞要擇日祭告郊廟宣捷獻俘等
因題奉欽依移咨前來該本部照例題請於本月二
十九日早遣官祭告郊廟是日御前宣奏捷音百官

吉服致辭稱賀其獻俘另行擇日具儀題請等因奉
聖旨是祭告南郊遣官徐文璧北郊朱印禎太廟駙
馬侯拱宸各行禮欽此欽遵隨行准欽天監手本擇
到本年九月初三日辰時吉獻俘等因到司案呈到
部臣等謹將獻俘合行儀注開坐上請伏乞聖裁等
因萬歷十三年八月二十三日本部尙書兼翰林院
學士陳等具題二十五日奉聖旨是欽此欽遵擬合
通行爲此合就行送該司卽行各該衙門欽遵施行
計開一前期禮部告示文武百官具朝服詣午門前
行慶賀禮一先一日內官設御座於午門前楹正中

是日錦衣衛設儀仗於午門前御道之東西教坊司
陳太樂於御道南東西北向鴻臚寺設贊禮二人於
午門前東西相向設文武官及諸番使人侍立位於
樓前御道南文東武西相向及刑部獻俘官位於午
門前御道東稍南西向設獻俘將校位於午門前御
道西稍南北向引禮引文武官東西序立獻俘將校
引俘列於午門前西邊武班之後伺候上位常服御
皇極門鐘聲止鴻臚寺跪奏請上乘輿樂作至午門
樓上陞座樂止鳴鞭訖鴻臚寺奏宣畢贊獻俘將校
引俘至獻俘位北向立定俘跪於將校之前刑部官

詣樓前中道跪奏云某官臣某奏某官以某處所俘
獻請付所司候旨傳下刑部領旨訖卽同將校押出
施行文武百官入班北向立喝排班班齊致辭官詣
中道跪致辭稱賀訖贊鞠躬樂作五拜三叩頭興平
身樂止鴻臚寺跪奏禮畢樂作駕興樂止百官以次
退右儀注亦載南詔野史似從邸抄中錄出者事屬
雲南所獻之俘且以見明時典禮之一端故附存之
十四年丙戌趙州甘露降

二月蒙化地震城堞官民居俱圯人畜死傷不少

遊擊劉天俸復迤西二城事下巡按御史蘓鄧覈奏以

冒功覆被逮併及金騰兵備俱下獄人咸寃之

滇攷迤西思威既內附其屬部有密堵送速二城久
爲緬據威提兵復取之十四年恭應裡徵二城兵不
應怒攻破之以多曩長散鐸率兵屯守思威糾思化
思順各土兵又求助以復二城遊擊劉天俸令募兵
五百往助之緬見以爲漢兵大至驚潰威乘勝殺緬
千餘人并二城之從緬者陣斬緬多曩長遂復二城
金騰兵備李材上其事下蘓鄩勘覆時在陣多土兵
不知取級旣而復往則已腐爛遂以冒功覆奏逮材
天俸下獄論者寃之

蛻按是役也通志所載微有不同云劉世曾以捷聞
陞按察使李材右僉都御史巡撫勛陽後巡按御史
疏論迤西功多戮屍抵級下李材劉天俸獄削劉世
曾籍以兩者比并觀之似滇考得實要之苟圖了事
擒岳鳳時已有成見則迤西之功當事所不願自宜
劉李之逮獄矣

十五年丁亥巡撫劉世曾黔國公沐昌祚誅羅雄叛酋
者繼榮吹設羅平州

志羅雄姓老羅姓榮姓叛撫鎮擊斬之遂改羅雄爲羅平
州設流官後繼榮黨董仲文復叛旋亦剿平

騰越饑七月地震

九月五芒雲見於曲靖之西

猛哈思化據蠻莫巡撫蕭彥密令撫夷同知漆文昌撫
諭之

滇考十六年九月思順亦投緬朝命以思忠等歸義
陞忠猛密宣撫思化猛哈同知思順蠻莫安撫如邊
城所議也比符信至而思忠思順等已復投緬乃以
忠母罕烘順母罕送各代子領該司印十月應裡攻
猛密罕烘不能拒率其孫思禮從子思仁奔猛廣而
猛密失猛哈思化復進奔蠻莫據之罕送率其子思

華奔騰越時有問罪思化之議巡撫蕭彥密令撫夷同知漆文昌撫化文昌單騎入化壘化稽顙聽命且云奴有助迤西殺緬賊功今無所歸願寄食於蠻莫從之

十六年戊子澂江元江地震

二月曲靖雨雹晝晦歷辰巳午三時

四月永昌姚營兵鼓譟索餉刼同知爲質抄掠抵省巡撫蕭彥伏兵要隘要擊之斬其魁范高謨餘俱省釋還伍

閏六月臨安通海曲江同日地震有聲如雷山木摧折

河水噎流通海公署民居皆圯壓死者衆曲江尤甚

楚雄旱

詔省銀場道分屬四守道

蛻按成化十九年增設布政司參議一員按察司僉事一員同管理銀課至此幾及百年矣然其間銀場有時停止豈官設依然尸視而不改乎分屬四道宜矣考南宋冶場多在閩粵而亦屬道員兼官竊嘗謂此等場務歸之守巡固是但周禮不過下士之職屬於監司方面未免傷體酌委丞倅領之似爲得妥至若牧令受地方之寄簿書期會政務紛繁又寧可令

其當爐事鍛以作此不急之務乎

秋八月鄉試通省生儒取朱思明等四十五人

志成進士者朱思明趙日亨王元翰朱化孚王夔龍
十七年己丑省城地震

臨安石屏芝草生

迤西思遠進象及方物詔遠爲孟養酋長

滇攷十七年迤西思威死其支子思明子思遠進象
及方物朝廷令遠爲孟養酋長

十八年庚寅彗見東南經旬乃滅

設羅次縣學

莽應裏進兵孟養遂破猛拱思遠奔蓋西

滇攷十八年應裏報密堵送速之怨進兵孟養遂破
猛拱遠與子思昏奔蓋西應裏僞署堵罕於孟養甕
罕於猛拱十一月緬破猛廣罕烘思禮與思忠妻甘
線姑奔隴川思仁奔雅孟猛廣亦失

潞江旱

五色雲見於蒙化西山

設新平縣改直隸新化州屬臨安府

志是年討平平甸鄉夷賊丁苴白改夷普應春等置
新平縣明年改新化州隸府

十九年辛卯澱江旱民饑

安寧火

永昌竹實

二月辛卯臨安大風拔木揚沙翻屋瓦

莽應裏率夷賊圍蠻莫攻迤西鄧子龍擊敗之

滇攷十九年應裏率猛別阿瓦糾堵罕甕罕兵圍蠻

莫思化告急時鄧子龍方聽勘奉檄率兵至羅卜思

莊緬敗退去化還蠻莫六月應裏遣使等毋海弄查

賁貝葉緬文來求通巡撫給榜文送緬使歸

七月騰越地震城崩數十丈軍民廬舍皆壞

八月鄉試雲南通省生儒取王致中等四十五人

志成進士者王致中楊應登陶珽俱祺楊師程孫學
易

二十年壬辰彗星見

大理地震

騰越饑

巡撫陳用賓題設蠻哈守備防緬從之

傳用賓晉江人有雄畧用兵如神甫下車察滇形勢
卽題設蠻哈守備

蛻按萬歷七年指揮方謐率兵戍蠻哈隴川多土寧

以爲不足拒緬後果無所用今設守備豈果勝於前
戍乎異時亦未嘗一得其濟而謂察滇形勢以設置
者或亦未然後之八關二堡庶幾近之

莽應裏令阿瓦迤西犯蠻莫鄧子龍擊之把總李朝岳
順戰死緬尋退去

滇考二十年思仁叛投緬仁烝其嫂甘線姑因欲得
之時線姑隨罕烘思禮寄隴川仁自雅孟率兵衆犯
隴川欲虜線姑隴川宣撫多思順有備弗克逞懼中
國問罪乃同丙測奔緬應裏僞立思仁於孟密當事
者移置罕烘思禮於芒市六月應裏使擺線由迤西